



Stant che Rafaël al è vie fûr de Patrie, o cjapi la peraule jo, la Sartore de ostarie. Se o vês viodût il TGR di orsere o varês di sigûr za savude la bielissime gnove: il nestri ostîr al à vinçût il Premi Scerbanenco Lignano Noir 2019!

Nô de ostarie o jerin za in agjitazion parcè che la sô conte *“Sul Tagliamento”* e je stade publicade dal Messaggero Veneto insieme a lis altris dôs rivadis in finâl: *“La saracinesca abbassata”* di Silvia Monego-Tazzari, e *“Tracce di sangue sul lavatoio”* di Giuseppe Mariuz. Duncje si saveve che la conte e jere in finâl, ma no si saveve ancjemò cui che al jere il vincidôr...

Un cadavar di un nordafrican al è stât cjatât tes gravis dal Tiliment, però no si trate di un incident: l’om nol è muart inneât, ma copât di une curtissade... *“Sul Tagliamento”* e scomence cuntune investigazion une vore difficile, ma e va indevant in maniere inspietade, cuntun finâl a sorprese che al è stât preseât di ducj i zurâts.

La premiazion e je stade îr a Lignan cu la presince dal scritôr Carlo Lucarelli e di Cecilia Scerbanenco, fie di Giorgio Scerbanenco, il grandissim scritôr di zâi e noir (e ancje di bielissimis contis curtis) che al à passât i ultins agns de sô vite propit a Lignan.

Il Premi Scerbanenco al è inmaneât dal Comun di Lignan par ricuardâ il scritôr, insieme a lis fiis Cecilia e Germana e in colaborazion cul Messaggero Veneto e Giallo Mondadori. Te jurie che e à sielt il vincidôr a jerin Franco Forte (dretôr editoriâl de *“Il Giallo Mondadori”*),

Oscar d'Agostino (gjornalist dal Messaggero Veneto), Elvio Guagnini (docent emerit de Universitât di Triest), Piergiorgio Nicolazzini (agjent leterari), Cecilia Scerbanenco (consulente editoriâl) e Nicoletta Talon (bibliotecarie). La conte vincidore e sarà publicade ta un volum de golaine Giallo Mondadori.

E o vin ancjemò une sorprese: tal servizi lâit in onde sul TG regjonâl no si fevele dome di Raffaele e de premiazion, ma e je stade nomenade ancje la nestre ostarie! A chest link si pues viodi il video

[www.rainews.it/tgr/fvg/video/2019/08/fvg-Premio-Scerbanenco-fd46a34a-1428-4d36-a825-87ed37101519.html](http://www.rainews.it/tgr/fvg/video/2019/08/fvg-Premio-Scerbanenco-fd46a34a-1428-4d36-a825-87ed37101519.html)

Sul sît dal Messaggero Veneto si pues lei la conte di Raffaele ta cheste pagjine:

[messaggeroveneto.gelocal.it/tempo-libero/2019/08/31/news/omicidio-sul-tagliamento-1.37399746](http://messaggeroveneto.gelocal.it/tempo-libero/2019/08/31/news/omicidio-sul-tagliamento-1.37399746)

Nô i fasin grandissims compliments a l'ostîr pal premi ben meretât e lu spietin par fâ fieste cun lui in ostarie!

*scrit de Sartore de ostarie*

